

四庫全書

集部

欽定四庫全書

集部
龜巢稿卷三

詳校官監察御史臣劉湄

中書臣劉源溥覆勘

總校官知縣臣楊懋珩

校對官主事臣陳文樞

謄錄監生臣張元愷

欽定四庫全書

龜巢稿卷三

元 謝應芳 撰

詩

養竹成大林

養竹成大林，頻年竹生孫。美竹非不多，惡竹亦已繁。羣奴為洗之，往哉聆我言。美者慎勿傷，去惡必去根。勿虞爾斧缺，勿憚爾力煩。宿莽蕩無餘，清風仍滿園。

樹頭鷓鴣鳴

樹頭鷓鴣鳴農人起耘苗問之何爾忙良田莠驕驕去
年耕較遲草蔓人力寡稂莠非不除卒以害吾稼吾聞
農人語猛省天下事養虎常害人玩寇亦如此

移家金壇尹干橋奉寄俞用中先生

辟地金壇縣懷人鐵甕城戰塵今滿眼憂國更忘情北
固山無恙中濡水最清卜居何處好為我主鷗盟

大父卒宋末莖烈塘之東墓松皆合抱數百株
一旦為鄉豪伐去郡縣弗能禁懇之分省亦莫

敢誰何應芳痛憤於家形於夢寐

當年掃松寒食朝紙錢掛之松樹腰今年無樹堪挂紙
冢頭插竹風蕭蕭孤兒抱怨吞聲哭躑躅歸來臥茅屋
夜深忽夢蒼髯翁手足裹創頭髮禿告言淮襄荆楚間
羣兇殺人連數年名門世胄皆赤族梗楠豫章何足憐
吾方欲問天下事雞鳴夢破心如醉髯翁恐是十八公
天和人和誰降凶

五噫歌

大明胡爲而翳兮噫大凶胡爲而裂兮噫觸邪之豸角
何折兮噫祥麟在郊足亦剛兮噫太平遺黎豈至是而
底滅兮噫

憶兄 八月中結友

平生愛緇侶逃難亦與俱骨肉不相顧安危意何如銅
馬從南來殺人血成渠一炬灰萬室九原槌含珠懷哉
眷令原何時蓬華廬橫山絕高處獨立眇愁予

三五七言

角蛇啼翼虎飛百年鳳雛壞五色鸕雛饑盲風怪雨已
連月青天白日寧無時

歲暮獨歸

浩浩北風吹戰塵還鄉無復見鄉人四郊荒艸斜陽外
一樹寒梅野水濱偶有新詩題甲子忽驚初度過庚寅
僧廬夜宿明朝別默念我蒿泪滿巾

西膠山雪晴

寫呈無錫州尹遂蒙
罷吳家渡築城之役

一夜雪深三尺強石人墮指冰蠶僵猶喜金烏兩翅凍

不折天明飛出海，上之扶桑老夫晨起膠山下風景看
來渾是畫，連山萬頃玉爲田，隔水數家銀作舍，田中築
城團義兵，日高未飯饑腸鳴，黃泥凍地硬如鐵，白柄短
鉏鏗有聲，不辭受饑寒，但恐虧工程，將軍踏雪來點名
萬夫鵠立顫，且驚馬前壯士五色棒，棒頭性命鴻毛輕
予生悔不習兵法，雪夜擒吳書奏捷，客攔抱膝漫悲歌
奈爾義兵寒苦何

丁亥歲旦徐達卿席上作

主人飲客椒花酒笑語春風口角生
久雨忽晴人共喜
又聞周鄭欲尋盟

元夕寓田舍有感

憶得去年王正月錢塘風雪正頻繁
馬周獨酌新豐市
韓愈三書光範門喪亂不霑新雨露
饑寒今憶舊田園
堠山西畔孤村裡借屋篝燈過上元

贈錢夢弼

連雲第宅堠山西喬木森森與屋齊
萬國熊羆方血戰

一林鸞鳳自幽棲東風池館春如畫長日笙歌醉似泥
吐酒錦茵容野客新年十日九招攜

丹陽陳天倪及其弟剛中奔牛陳心遠等諸羽
士避兵洞庭山寄此代簡

洞庭林屋聚羣仙問訊曾逢賣橘舡湖上白魚多滿尺
山中朱果不論錢仙家犬吠雲連屋澤國龍吟月滿天
辟穀有方煩寄我吾將多與世人傳

陳大翁過堠山客舍情話連日追悼母氏使應

芳情見乎詞

翁名師可字伯大
宋常州通判之子

外家親戚惟翁在相見猶能話阿嬭
三夜客窓同寂寞
兩年兵火共流離可憐今雨窮途客
誰識前朝郡倅兒
前世青氈零落盡行囊留得數篇詩

寒食日聞鄉信口占

鄰舍驚呼避蝮蛇老妻嗔怒唾烏鴉
誰知昨夜三更雨
又送春風一度花寒食清明人上冢
夕陽芳草客思家
愁來復遶青山去何處壚頭酒可賒

訪孟伯堅周履道不遇

班馬文章駕並馳
雲龍追逐去何之
門前流水垂楊柳
屋上青山噉子規
三月又逢修禊日
一觴還憶太平時
可憐潦倒無家客
滿目風塵兩鬢絲

刺促行次履道韻

刺促何刺促
江上秋風破茅屋
誰憐杜少陵
長歌之哀甚于哭
故山可望不可歸
髑髏臺高春草綠
浮雲萍日竟誰洗
烈火連天勢難撲
三農不復把犁鉏
風雨荷戈

城上宿於乎人生有子作征夫不如返哺林間鳥

題春林雨意圖

前山後山雲氣濃欲雨不雨天無風記得去年初夏裡
此時船過滬湖東

懷周履道

平生多朋遊窮途見交態每歌杖杜詩重念伐木廢孰
謂新相知情如舊親愛手書辱殷勤授粲慰行邁我老
無能爲執德心未艾秋風自搖落松柏歲寒在

狗寨謠

往聞淮西軍食人狗亦有寨屯如軍是時江南幸無事
尚謂傳者言非真安知吾鄉今亦爾地方百里皆荆榛
三村兩村犬成群見人如見東郭魏跳踉大噉猛于虎
陂陀高踞聲狺狺路傍青草堆白骨天外飛鳶銜斷筋
征夫早去膽欲落冤鬼夜哭情難伸可憐性命葬饑腹
徃徃多是近鄉民向來喪家狗絕食遺骸或與狐狸分
乘時爲暴至若此此事千古同悲辛寢皮食肉不可得

張牙弄爪何由馴虞廷九官分厥職益必掌火山澤焚
犬乎犬乎胡不草爾心全爾身主爾主鄰爾鄰搖尾乞
食仍相親毋使犬砦之名天下聞

壽玉山主人

黃梅雨歇南風清綠槐如雲陰滿庭胡髯雪白雙眼明
長日細字箋龍經有時忽著道士服騎鶴三天奏符籙
天上神仙知姓名人間富貴差馳逐翁年已髦何矍鑠
姮娥應授長生藥我來避地方卜鄰翁與談天甚爲樂

酒邊却笑磻溪翁吾年與同心不同鷹揚未若漁釣好
周家自有羣罷熊平生毛穎與親炙老去麴生尤莫逆
白鷗之盟君忽渝門外紅塵一千尺

八月十六日顛沛中見顧玉山蒙置酒嘉樹軒
相與劇談痛飲懽如平生且有來夕草堂之約
既醉而別賦此以贈

來往東吳三十年吳人多示好詩篇片言堂下知醜茂
一笑尊前壽魯連嘉樹連雲秋不老桂花如雪月仍圓

烽煙只隔重湖水且爲交懽理素絃

留別顧玉山將往杭州卜居

垂白遭多難倉黃走四方吳人今入貢越寇復侵強百
戰山河破三邊草木荒軍容皆赫赫徒御亦揚揚舉士
思投筆農夫習臂槍誰令紀綱壞未改瑟琴張卓爾文
章伯平生錦繡腸琴書曾不廢軒冕迴相忘愛客坐常
滿耽詩夜亦忙登龍嗟潦倒鳳鳥與翱翔說項口不輟
留髡興甚長百篇詩自和屢舞酒淋浪老驥羞踰伏饑

鷹欲遠揚憂天如祀國辟地卜錢塘丞相聞新詔除官
率舊章覆蕉曾有夢腐草或生光蕭颯雙蓬髻漂搖一
葦杭第慙金自躍何以玉能藏海底珊瑚赤松根琥珀
香明朝重回首嘉樹鬱蒼蒼

贈道傳上人

偶識廬山遠山莊借屋居撥雲分醵酒踏雪送寒蔬門
俯溪光迴窓含野色虛相過兩不厭燈火案頭書

送蔡伯昇避兵澱山依故人

典衣沽酒磧沙頭送客攜家訪舊遊
虎窟攜來桃竹杖鷗波蕩去木蘭舟
黃楊偶厄今年閏老菊重逢九日秋
覓得桃源堪避世結鄰當與老菟裘

陳湖夜泊

平湖秋水清如鏡照見潘郎兩鬢斑
帶箭飛來何處雁一聲哀怨入雲間

訪澱山因自明習無學二禪老

西風滿帆天所假扁舟過湖快如馬
欲尋漁父問桃源

因訪高僧過蘭若南能北秀兩魁竒翠竹黃花總瀟洒
相逢握手問流落試爲從頭畧傾寫生居揚子大江濱
老我毘陵力田者羣克西來火三月四境更無茅一把
鄉鄰死戰血漂杵妻子生擒肉爲酢隨波幸若魚漏網
失窟驚如魏在野山中碧松堪療饑池上白蓮宜結社
笑語同打有髮僧數見不辭禪杖行

懷玉山隱君并簡其子國衡

錦翮鷓雛海上回無端鷗鷺失驚猜青山靜對機心息

好客相過笑口開
魚躍水池堪入饌
蛆浮膈壅足持盃
官軍赴敵忙如蝘
奈爾重門掩綠苔

懷袁子英

疇昔尋君竹浦西
芭蕉葉上姓名題
別來歲晚相留戀
行到窮途孰指迷
兩鬢風霜秋颯颯
一蓬煙雨晝淒淒
遙憐冠蓋高陽里
長伴山翁醉似泥

懷諸葛用中

每憶君家書畫船
夢魂飛繞太湖邊
干戈滿地無休日

萍梗他鄉又一年西北天高煙霧隔東南海濶水雲連
何當覓得蓬萊路相與從遊採藥仙

至正丁酉冬玉山燕客芝雲堂適有時貴自海上來以黃柑遺之玉山乃分餉坐客且曰吳中以連年擾攘無之今有之諸君子不容無詩故有是作

青中西來食人肉逃難西山采黃獨上書不伏光範門
忍饑寧負將軍腹玉山燕客客滿堂香柑新帶永嘉霜

分金四座照人面
漱玉三咽清詩腸
山中柳瓢如大斗
吳姬擘來薦春酒
酒酣遙指洞庭山
爲問木奴曾貢否
頻年兩浙阻兵戈
黃柑綠橘不相過
此時共享此佳果
胡不取醉花前歌
漢庭傳柑還賜宴
應念江南久征戰
聖恩有詔息蠲租
可奈數州人已無

贈鎰元臣何士安二省郎

冬十二月一雨滂
婁江水高三尺強
翩翩使者傳令急
肅肅官軍赴敵忙
日出山頭雲氣白
春回海上柳枝黃

捷書明月報樞府連璧少年增寵光

錢夢弼移舟過姜里後三日余往見之適夢弼

卧疾董子舍中正月賦此為別

堠山之別苦倉猝甫里相逢說亂離喜見新年王正月
重瞻舊日漢官儀酒杯不惜金魚換藥杵何勞玉兔持
借問董家雞共犬有無祥瑞似前時

漫興

甫里水東流垂蘿繫客舟客心清似水吟髻白於鷗詞

賦知無用干戈苦未休蓬窓三日雨農事憶西疇

二

五十不富貴蹉跎又六年新愁添鶴髮故國暗狼煙白
帽看雲坐青燈聽雨眠痴兒書懶讀翻笑腹便便

三

吳地方千里齊民總荷戈人生無可奈天運竟如何米
市黃金賤沙場白骨多故山時一望老眼泪懸河

四

卷三
伐木燒官炭中林霹靂飛窮猿無可擇飛鵲更何依
野雨生梯稗山風長蕨薇兒曹能采擇猶足慰年饑

五

吳女何多巧吳趨作楚聲市廛方易肆朱粉復傾城
壓酒桃花塢彈箏細柳營將軍正年少相顧若爲情

六

闔閭城下柳誰種綠陰成樹繫浮江馬枝遷出谷鶯我
朝方用武僧寺總屯兵猶喜湖田熟街頭米價平

七

田舍方東作州家要義兵
瀕湖團水寨劖石甃山城柳
暗村煙暖芹香潤雨晴荷
鉏歸未得布穀爲誰鳴

八

盡道從軍好封侯甚不難
羽書頻報捷相府即除官
北關煙塵遠東風雨雪寒
腐儒人共笑白首鹿皮冠

九

赫赫千夫長搖搖四櫓船
船輕如躍馬冠退欲歸田
蓑

笠松江上犁鉏穀雨前只愁邊報急生計又茫然

十

太湖三百里流血水雲腥戰鼓有時歇漁歌無處聽飄
零孤鴈白慘淡遠山青題橋音書斷令人憶洞庭

十一

近聞哀痛詔使者又江東兵革何時息軍書四海同落
梅春雨後芳草夕陽中俯仰長流涕窮途一老翁

顧國衡萬戶席上與乃翁及元璞長老等數客

把酒賦詩各成七言四韻

客來寒食清明日每日春風醉玉仙
綵筆醉題鸚鵡賦寶香頻爇鷓鴣
斑簾前脩竹翠欲滴地上小桃紅更殷
按得錦箏新製曲隔花黃鳥共間關

宿壽上人山房再和金西白長老韻

春來淮楚兵方息今夜村莊犬亦寧
分得梅邊半窓月借看松下兩函經
屋山風颺茶煙白江浦雲連樹葉青
來徃風流似支許獨慙吟髻已星星

訪積善寺貴上人適與旌德寺學無為明月庭
讌集四人年皆五十有六酒邊聯句共成一律
既而又各和一律

四人二百廿四歲

適翁

一日酒傾三百杯

月庭

醉裡不

知浮世狹

無為

吟邊但覺好懷開

應芳

春雲冉冉連江

樹適翁晴雪紛紛落野梅

月庭

邂逅相逢離亂日

無為

布帆無恙亦佳哉
應芳

和

四人二百廿四歲野老浮家僧渡杯喜共江湖春水靜
適逢西北暮雲開神仙換骨元無藥宰相調羹自有梅
旨酒正須終日醉醉鄉佳處亦悠哉

送梅州判之崑山

百戰歸來佐一州貂蟬從此出兜鍪山城近海金湯固
市舶通番食貨稠下馬正逢梅子雨勸農須趁麥花秋
薦賢不負尚書意治最功成秩更優

端午日瑞光寺西白長老方丈作

藕花池上端陽日
菖歎香浮藥玉船
可喜山僧能好客
常容野老醉逃禪
連宵雨漲三江水
當午雲開一鏡天
醉倚浮屠望鄉國
橫山依舊暗烽煙

對雨書懷

書生得句百憂忘
更喜新知共一方
醫士為焚賒藥券

指顧
彥文

鄰僧借與讀書床

指壽
道傳

十年鄉國煙塵暗
五月江

村風雨涼不用弱流三萬里
地無豺虎即仙鄉

次韻贈管伯齡

風連四海塵身世等一漚斯文幸未喪同類猶相求
蜉蝣果何物敢作撼樹謀諸公新亭淚可笑學楚囚我無
西園金孰問東家邱嗟爾一片玉產此崑山州天門九
重深獻納亦未由江村茅屋雨湖田稻花秋門外車有
轍窓前水長流時無華子魚幼安誰與儔濯足弄雲水
商歌興悠悠胃蟠五色綫唾視開 鍼芥適相遇珠
璧驚暗投酒杯接慙懃詩盟結綢繆千金享故帚猶曰
不易酬新知如故交一笑忘百憂停杯問蒼天干戈幾

時休金風雖乍起火雲未全收溪橋柳陰清繫我三日
舟操執不忍別相期重來遊

甫里先生

有田二頃可無官況復時危行路難丹鳳徒勞銜詔下
白鳧自放出闌看春從顧渚隨茶竈月向淞江伴釣竿
舊宅不知何處是浮屠樓閣倚高寒

次韻袁子英過吳江蕪簡琦龍門

孤城當澤國潮撼勢如浮拄杖尋僧寺長橋繫客舟江

寒楓葉落湖暝蝮蛇遊寄語龍門客詩盟莫負鷗

江上女和子英韻

妾生吳江上阿爺最鍾情十五嫁夫婿紅顏如舜英別
來各天涯所共惟月明妾守江上宅夫戍邊頭城江上
畏行路邊頭防斫營一朝義當盡性命鴻毛輕死願化
葵藿兩兩心同傾

送顧玉山遊東南諸山

我愛向子平婚嫁畢兒女平生掌中珠棄置若敝屣百

事不挂眼五岳縱遐武朝與麋鹿遊莫與泉石伍泉石
初無情所喜絕塵土松風出林磴笙瑟音調古但聞幽
鳥鳴猶勝俗人語吐彼貪墨徒臍燈照金塢遺臭千萬
年其禍皆自賈吾知子平心夙昔慕巢許矧茲風雨秋
摧蘭折衡杜往哉山水窟幽期赴緇侶解纓濯滄浪苔
花八風舞老我病江沱臨風爲延佇

和顧仲瑛金粟冢讌集詩

我昔過北邙立馬山之隈爲問隴頭樹皆云後人栽生

前尊酒誰不有無人到此自對青山開屋堆黃金五侯
貴難免白骨生蒼苔最憐吉士或枉折有如爨下焦桐
材玉山先生達觀者曾次不着閑悲哀清秋攜客坟上
飲麪車載酒山童推大笑胥魂乘白馬深慙絲魄化黃
能墓銘自製身自挽視身不啻輕如埃鸞翔鳳翥玉箸
篆虎踞龍蟠金粟堆鶴羣三統喜樹舞龜趺並載豐碑
來長吟復短吟此興何高哉秋風無情摧萬物芙蓉亦
老胭脂腮笑言他年翁仲共寂寞何如此時賓客相追

陪功名絕愁根富貴脫禍胎百年能幾日一日能幾杯
從茲秉燭長夜飲猶恐四蛇二鼠忙相催主人爛醉客
亦醉絕倒不顧傍人唉北望中州數千里人家盡作兵
前灰髑髏委江郊多是賢與才忍饑自作首陽鬼獨醒
誰念湘江纍神仙初無不死藥方士浪說尋蓬萊君不
見無邊之海白淼淼無名之山青巍巍長鯨噓吸成風
雷徐氏一去何曾回

玉山以予欲徙居淞江之東設席書畫舫邀袁

子英陸元庠恢上人用江東日暮雲分韻賦詩
以餞予得江字用以留別

浮家野老雙目厖捩柁欲渡吳淞江東將入海釣濤瀧
玉山山中別老龐西池之屋如解艘左圖右書堆滿窓
燈花摇摇落銀缸葡萄濫濫傾玉缸四檐白雨飛流淙
若裂媧石銀河洛主人長歌客接腔翕然鐘鼓相擊撞
酒酣捉筆如長杠千軍可掃鼎可扛諸公大才齊楚邦
騷壇老將霖麾幢客來投戈乞受降乃辱贈以白壁雙

明朝短纜擊舊椿
馮夷前驅鼓逢逢
海濱懷人倚石砭
書筒時寄黃耳厖

來龜軒詩

為顧玉山作

維歲之初兵閔邑里我鑄其局以辟以徙今我來思室
有爾龜我墉弗穿爾從何來委蛇委蛇爰曳其尾來龜
之祥云何不喜我戶伊威我牖蠨蛸嗟我婦子亦孔之
勞爾具泥塗我室我家豈不爾思以名其廬瞻彼池水
有蒲有蓮爾居爾游以永其年

袁子英偕宗別傳過天慧莊因獲晤言夜話之
餘口占以贈

短髮蕭蕭雪滿簪老禪方丈挂瑤琴月明每憶許元度
歲晚同來支道林四海干戈猶在眼百年軒冕總無心
梅花玉立西窓下相伴哦詩到夜深

子英之玉山顧隱君令於同里法喜寺樓居日
鈔佛書至午而止餘暇則吟咏不輟雖親舊來
訪亦不往答焉余因子英復去作此代簡

金方山志卷三
客來喜得平安信，蕭寺樓居日揜局。
湖近浪搖窓影白，地偏苔沒履痕青。
羣賢方結蓮花社，小楷猶鈔貝葉經。
歲晚扁舟歸甫里，好尋漁父過寒汀。

送照元明住白馬寺

老梅飛去跡猶靈，七十二峯湖上青。
已喜黃龍新說法，無勞白馬遠馱經。
六時花雨狻猊座，五色雲開翡翠屏。
挹取寒泉同煮茗，予將歲晚過禪扃。

冬至日陪高太守坐愚隱山房讀易有感

一殼混沌破二氣從此分消長固有時變理亦在人云
何數年內濁亂暗楚氛維時當嚴冬袂衣暖如春中林
竹抽萌花間雪紛紛陰極陽復生踐長喜茲辰蒲團踞
禪榻芸窓對爐薰筌蹄謝支許羹牆見羲文嗒然我忘
吾萬事何足云

人日懷管伯齡及杜泉玉昆仲一山上人

吳淞江頭春水生美人不來舟自橫一年又過牛羊日
四海豈忘鷗鷺盟管寧白帽傲軒冕杜陵名家多弟兄

結社香山僧更好野老何緣與姓名

劉景儀寓崑山永懷寺除日作詩三十韻見貽

時余客薦嚴因次韻答之兼呈兩山主人

遭亂心如箭偷生髻已華一年看又過幾度發長嗟
淮海浮羣鳥荆蠻鬪兩蛇妖氛渾不散殺氣轉相加
倦客誰相過高僧意孔嘉燒香談般若倚樹聽楞伽
風月生石文章五色霞階前時刻草坐上或拈花
我下南能榻君居北秀家
麗豪笑俗子歌舞擁高娃
重費纏頭錦

頻敲拍板牙何如依有道樂此寂無諱法喜常親炙塵
心亦變花濟河求巨筏出宅問三車兵火西來盛神京
北望賒憂天同祀國賦雪擬劉義西寺齋鐘應孤城戍
鼓過朋遊欣密邇世務奈紛拏袞袞華軒鶴喧喧晚樹
鴉餘生知有幾學步恐成差故國歸心切烽煙望眼遮
衣冠無噍類戈戟亂如麻不識蓬萊路那逢博望槎憤
秦思蹈海悲楚欲還沙竊比君臣蟻誰憐喜怒蛙桃符
驚節換萍跡寄天涯君憶蘇隄柳予懷陽羨茶吟篇聊

金方... 卷三
倡和醉筆半歌斜此意方相得前言匪敢誇尚期金百
鍊永保玉無瑕

聞顧玉山芝雲堂火而所藏之書俱焚恐其不
能為懷寄詩釋之

誰將藜燄燭羣書腹笥便便自有餘得失未須論塞馬
平安聊復問池魚草堂留客仍投轄香徑尋詩可曳裾
別院海棠春滿眼重來燕子喜何如

和玉山初夏言懷

聞君久約東林老林下棲遲避俗塵蓮社不妨陶令醉
韭菹誰信庾郎貧蘇湖渺渺田皆水淮海茫茫草没人
春去百花先自落五更風雨况相因

二

四海風塵渾未息一時天道豈無知待看雨散雲收日
依舊青山綠水時死欲便埋童荷插生能自挽手栽詩
道今風致清如許行路相傳口似碑

再用韻寄悅堂長老

松雪孤標孰與倫
煙霞一室靜無塵
清談每日能留我
自說平生不患貧
城郭含輝山韞玉
階除聽法石如人
曇花不逐春紅老
信與東風別有因

二

老虎兒孫到鳳池
聲名曾徹九重知
鶴書天上頌恩日
猊坐山中說法時
寸草不忘慈母報
白華無媿故人詩
春秋直筆黃夫子
曾為東鄰著二碑

踏車歌

吳田水深三尺許總是去年秋暮雨勸農使者催春耕
田甲頻搗水車鼓江村破屋能幾家家婦姑俱踏車
蓬飛兩髻赤雙脚亦有女兒雙髻了松江太湖愁滿眼
白汗沾衣足生趺車輪轆轤羊角轉水波翻翻龍舌卷
春來十日九不晴怕聞鶉鳩呼雨聲滂沱纔裨片時久
辛苦又加三日程當家豈無夫與子打魚日糴去城市
城中禁米難出關田上忍饑還戽水四郊未種圍田穀
三邊已運官倉粟安得木牛為水龍運水疾於牛足陸

金野月
卷三
西林日落田婦歸隕岸白煙魚虎飛詩翁獨立長太息
何處青山有薜薇

和陶菊莊郊行

崑山春暖玉生煙滬瀆潮平水接天行到滄洲人寂寂
坐看青苻葉田田

二

十年四海暗烽煙五柳先生醉樂天芳草夕陽江上路
獨憐春水滿閒田

梅子玉判官勸農過客舍口占以贈

婁江之南一萬家
葑田水深忙踏車
喜有春禽鳴布穀
幸無夜雨漲桃花
州倅勸農頻出郭
野航牽纜小如瓜
白鷗也似知人意
引領相將立釣槎

觀浴佛有感

銀盤水浴紫金身
白髮禪和拜跪頻
周孔豈無初度日
諸生誰為薦溪蘋

和顧玉山重構釣月軒

虎戰龍爭無了日他年誰是復誰非諸公圖像凌煙閣
此老逃名釣月磯新雨一池荷葉長南風四月棟花飛
我來喜聽滄浪曲欲挽遊絲繫落暉

夏夜作

五年兄弟各西東兄在今年七十翁戎馬此時猶塞路
羈鴻何處或傷弓對床夜聽空階雨擁被秋吟破屋風
夢裡不知身是客覺來愁絕泪沾膺

陪梅州判智長老石教授陳惟兄壽上人等遊

姜公墩小酌梅以杜子美興來今日盡君歡分

韻余得日字

白雨洗炎歊秋風灑瑟瑟梅仙約幽尋邀我杖藜出同
遊得名緇飄然興俱逸移舟泊釣渚看竹過僧室行行
陟高邱苔溪樹陰密崑山含玉潤巋然如卓筆羣峰太
湖上雄勢爭翠嶺江中早潮回風急去帆疾梅仙最多
喜播種農事畢青苗匝吳田芳草眠繭粟斯民久塗炭
天意諒深恤兵餘喜豐年一飽百憂失懽然各有慶雙

榼酒盡吃安知艱虞世得此閑暇日幽情寫絲桐餘懷
聊短述

次韻贈虛中講主

三友高論久寂寞一鼓雷音號令嚴正法眼明出下電
玄機味若水中鹽池蓮玉立天開鏡庭竹金聲風捲簾
大地正須沾化雨蹄涔寧許老龍潛

六月廿二日愚隱和上以詩留別徃磧沙寺以

寓耕鋤具詩末句云一聲短笛滄江暮收拾絲

綸下釣臺予次韻二首送之既而懷磧沙諸公
復就韻代簡

一曲滄浪歌未了滿船明月賦歸來俗塵自暗人間世
不着纖毫惹鏡臺

二

白髮道人無處著磧沙湖上去還來湖深六月天風冷
花雨吹香般若臺

右二首送愚叟長老

又

誌公刀尺傳家久
船子絲綸罷釣來
一鏡湖光照樓閣
共看明月坐高臺

二

瀕湖金刹清涼境
冠蓋時時聽法來
刮目試看天下士
幾人胸次有樓臺

右二首寄剛中長老

又

長歌白雪無人和近喜碧雲禪老來龍女獻珠煙水國
馮夷擊鼓雨花臺

二

一牛鳴地長相憶賴有尺書時往來白馬山中人獨遠
孤雲落日在琴臺

右二首寄閑野舟兼懷照元明

又

連日顛風吹海立幾時飛錫過湖來絕憐湖上林泉好

六月清風似五臺

右寄益以道

又

劫火煙銷江總宅
斷蓬風轉海濱來
干戈未息衣冠老
誰築黃金聘士臺

右寄江叔庶

寄趙君綽

舊家公子老儒冠
詩卷梅花共歲寒
湖上月明攜客飲

樓前山色枕書看十年四海風塵暗久旱三吳水澤乾
滿目天雲秋後熱敢題尺牘問平安

送扇贈趙執忠

送子扇一搨呼兒書八分相望湖上宅只隔隴頭雲南
國多秋熱西風有楚氛庭幃清枕席持此奉殷勤

寄天章上人蕪簡陶菊莊

東林花雨滿衣巾文采風流有若人留客看山常滿座
開軒臨水迴無塵娟娟烏鵲橋邊月灩灩葡萄窰裡春

朝夕往來陶博士應拈醉筆賦詩頻

簡西白長老

高情每向詩中見怪事今於病裡聞
船去逆風牽纜怯
葦花飛雪暗江濱
雁來南國邊聲遠
鴉集西林野色曛
笑拂袈裟歸櫂
李秋風塵土自紛紛

贈費克明知州

崑山之石白如玉
婁江之水涅不緇
試持山水比州牧
厥德清白同于斯
吳儂賴公父母慈
遭時艱危蒙撫綏

盡令賣刀買牛犢不失與國充耘耔訟庭無人辨雀角
園扉空鎖生蛛絲獨憐沃土重財賦瘡痍不忍加鞭笞
早騎羸馬戴星出晚踏明月歸來遲紛紛公務日不暇
炯炯此心天弗欺每延多士談禮樂頓覺喜色浮鬚眉
菁莪方育泮林雨薺麥當茂冰霜時未擬丈翁能化蜀
已過魯山無紫芝蜚名籍籍動藩府將徹九重天子知
夏五聞吳門湯君說以書見寄既而茫然九月
末因馬吉卿來甫里詢知君說仍居間詩以代

簡

不見故人逾六載曾聞書札寄多時浮沈江上知何許
淪落天涯有所思老驥未應甘伏櫪驚烏可是別無枝
欲過竹所尋袁粲每望山陰憶戴逵策策秋風桐葉盡
淒淒寒雨菊花遲幽懷每日如中酒世事頻年似奕棋
一笑相逢期未得邊塵滿眼鬢如絲

送愚隱長老主萬壽寺

戎馬廢六籍三乘亦多魔中流屹砥柱猶能障頽波吾

師雲卧久王公禮為羅說法繼禪月珠林雨曼陀宏開
甘露門諸根並漸摩一鼓氣復作天龍衛煙蘿秋空雲
霧開佛日光輝多

題林泉雅趣圖贈杜玉泉

泉翁愛山如愛客到處好山皆莫逆脚根不沅京洛塵
面紋長帶煙霧色奚童抱琴翁曳履長日山中看流水
萬松清籟響如絃滿地白雪吹不起桂風蘿月秋復春
野花幽鳥情相親巢由相去數千載黃綺以來能幾人

山顛水涯風物美都在我翁詩卷裡莊周夢蝶夢周
覽是圖者同天遊

寄屈時中諸友

白蠡塘南煙水村伊人避世若桃源家家雞黍留賓客
夜夜熊丸教子孫慈竹叢深冬笋出野梅根暖早花繁
扁舟一夕乘清興我亦來敲月下門

逢鄉僧昱東明

他鄉逢着故鄉人叙舊情如骨肉親猶喜吾兄存兩子

俱從釋氏究三身煩君為寄平安信道我今居寂寞濱
何日浮杯來甫里寒窓燈火話酸辛

梅子玉董版築於杭城別去日久區區思懷作
此以寄

錢塘江上石頭城畚插如雲杵雨聲兩袖西風騎馬立
五更殘月聽雞鳴銀屏搞酒平章喜金鼓還州父老迎
力盡東南非一日政須遺愛撫孤孥

奉寄楊鐵崖先生

光範門前三上書先生曾為發長吁畫橋楊柳藏書屋
鐵笛梅花落酒壺偶遇故人論北海相思一夜夢西湖
由來海內誇長句肯寄浮家野老無

寄題悅堂長老城南小隱絕句

為愛城南水竹幽高人結屋近滄洲東園十畝蹲鴟熟
足擬人間萬戶侯

二

門前流水與江通屋上青山與畫同文武衣冠來聽法

紺園長繫五花驄

三

象龍入室動成行
燕雀隨人亦賀忙
白髮老禪揮玉麈
袈裟猶帶御爐香

四

屋頭新植青松樹
池上重栽白藕花
元亮孤舟靈運屐
不妨來與共煙霞

五

客來多是一宿覺我亦幸有三生緣扁舟過門清夜裡
烏几燒香繡佛前

題淵明采菊圖

一官棄如屣三徑今來歸言采東籬菊如彼西山薇
秫田未熟禾無酒白衣攜來恰重九今年不識是何年且
為黃花開笑口非無小窓膝可容花前一笑樽已空衰
顏得酒借春色霜染樹頭秋葉紅先生之貧人共惜先
生之心人莫識大厦難將一木支逃入醉鄉聊自適

玉山邀至同里法喜寺飲別是夕酒醒夢回宿
雨初霽月明可喜即景賦詩兼寫送別之意

風吹雨脚斷月到天心明孤鶴有清夢荒雞非惡聲南
浦明朝別西湖幾日程杵歌人正苦莫上石頭城

寄愚隱長老

別後逢人問北山吳門第一古禪關江湖瓶錫多依倚
文武衣冠數往還鐵騎解鞍祇樹下金魚換酒雨華間
最憐丈室雙童子捧茗燒香不暫閑

寄虎邱居中長老

初春船過百花洲不謁閭邱謁虎邱古徑入門蒼蘚合
新城繞寺翠嵐浮遊方每學僧行脚聽法當隨石點頭
更覓西庵修竹裡寒泉一勺薦前修

和玉山排悶

寒窓誦君詩字字黃絹婦嗟君邁迤遭蛇虎嚇前後毅
然能忍性不矯亦不揉黃金本何物一任化烏有胸中
耿耿在依舊衝牛斗大兒萬戶侯金印已懸肘小兒未

強仕詩禮方授受兩娥遽奔川星橋吠天狗更憐鳳臺
女先亦辭父母君能悟空幻視世等塵垢哦詩作遊戲
一日凡幾首開尊飲詞客錦段從醉嘔愛賢眼常清垂
老髮仍黝逆境雖滿前百戰喜不負憧憧彼貧夫富貴
爭進取力強誇拔山勢熱可炙手美新皆揚雄托孤誰
杵臼龍為堅白論衍事雌黃口何如玉山人不失素所
守愚也比方臯識馬忘牝牡傾蓋即相知論文仍耐久
歲寒松柏青先零媿蒲柳嚮來九折坂此日一杯酒豪

吟鬼神泣醉筆蛟蛇走萬事付無言泰山同培塿

焦任道欲過壽上人山莊并與僕相見前期以
詩見貽傳和之邀僕同賦

舊說君家有墨莊新詩今見墨雲香聞來林下尋緇侶
當為牆頭喚索郎邊境日來西寇近滄江歲宴北風涼
先生素識融公懶莫怪而今不下床

再和韻寄趙彥深

平原公子午橋莊草木當年雨露香桂樹不嫌招隱士

桃花應喜識漁郎錦茵醉酒冬宵暖水檻垂綸夏月涼
我亦欲招橫玉去為君三弄據胡床

次韻寄杜玉泉昆仲

授書不逢黃石公采藥不遇龐眉翁杜陵名家好賓客
客裾來曳梅花風德哉若人氣冲融渙然釋我心怔忡
張燈為展風月宴坐客總開冰雪容火蛾熒煌吐星斗
金鼇顛顛移方蓬高年垂及絳縣老合歡要策青州功
唾壺擊折玉如意臂鞬珠脫攜歌童飢舫浪翻翠袖濕

笑絕如舉驪山烽紫雲一曲歌未了陽烏飛出扶桑東
明朝仲氏復迎客百花潭邊收釣筒長魚斫鱠白於雪
葡萄新釀青如空高堂坐擁肉屏暖寒士無復鳴秋蛩
溪山相映色俱喜墮篋迭奏情無窮老夫生長近吳下
所恨白首方遊從頻年坐我塗炭苦此日置身仙子宮
已令沈湎恣為樂尚論古人容折衷賦歸既無田種木
獨醒敢誇衣集蓉銜杯樂聖非易得良辰美景真難逢
論交不以車笠異忘形且喜襟期同吐彼貪夫逐名利

何異糞壤蛻螂蟲蠻爭觸戰更堪笑要於蝸角稱蠶叢
邊隅風塵莽浩浩天門煙霧深重重世云酒為知己飲
可不罄爾琉璃鍾扁舟往還渡吳淞泗橋且喜春潮通
興來徑去造竹所碧灣樹下維孤篷祇慚詩債償未了
毛穎為我長忽忽此詩聊寄前日事此韻乃和前年冬
分柑與君細說項眉案坐對如梁鴻

碧雲山房分韻得檐字

古寺雲林靜春宵風雨兼阿師如惠遠有酒醑陶潛海

味分苔脯園蔬摘韭尖金蕉傳四座銀竹瀉層檐談辨
情相洽醺酣意轉快燭長紅未盡餅罄綠頻添小令皆
毛舉新題各口占襟懷雖曠達詩律自清嚴浪雪翻茶
鼎香煙統竹簾偶論蝸國戰因笑楚人鉗老去甘藏拙
閒來得養恬青松知此意相對一掀髯

雨夜懷朱澤民

一天風雨夜漫漫獨為先生發永歎杜甫數椽茅屋破
鄭虔三絕坐氈寒鶯花紫禁回頭夢煙樹青山抱膝看

最憶舊遊諸閣老別來零落漢衣冠

和鄒宏道諸公遊磧沙寺

錢塘形勝絕蘇湖風物於今入戰圖
獨爾磧沙仍似舊諸公杯酒不相孤
遠山雲歛千峰出幽樹春來百鳥呼
白髮老僧盤膝坐笑看車馬陟危途

次韻寄路以道

笑將簪紱棄如泥出郭移家住水西
芳草喜人車轍少遠山齊我屋檐低
門前古樹慈烏集梁上新巢乳燕棲

更喜東橋僧舍好桃花多似武陵溪

送居南山還嘉禾

檣李亭前水接天揚侯曾此洗龍泉道傍已伐將軍樹
湖上今題書盡船滄海揚塵知幾度黃楊厄閨又今年
因君與說干戈苦相送臨期一愴然

題李白月下泛舟圖

青蠅觸起脫鞞時飛燕嗔人鳳亦疑杯酒佯狂江海
上此心惟有月明知

七月二日過益上人問病因過路以道山人家
飲酒樂甚詩以謝之

新秋去謁病維摩因與山人醉薜蘿頭戴鶻冠堪入畫
手鳴漁鼓更能歌竹邊亭子清風細壁上詩篇好客多
從此往來溪路熟扁舟乘興數相過

賀梅同知遷秩

我愛朱絲絃其音淡如平為人滌邪穢妙理通神明良
工繫錦瑟選練亦已精移柱喜更長白雲風泠泠

二

我愛青銅鏡炯如秋月圓為人別妍媸毫髮俱了然纖
塵不受汚光輝共人憐政須重拂拭玉臺更高懸

窈窕誰家女和卜思顏韻

窈窕誰家女依稀慕璫樹向來適良人門戶比房杜今
年遘疾難飄零太行路風雨道傍花不失春態度珠簾
十二樓燕子忍辭去合歡會有時無勞歎遲莫

次韻寄呈謝杭州

金湯險據鳳凰山日月遙瞻虎豹關每見題詩懷故舊
也知為政有餘閒慈幃一飯雙魚美衙鼓三過五馬還
細說平章親更喜黃金插帶綵衣斑

中秋日玉山顧仲瑛邀程明府份陸良貴仁秦
文仲約等十人飲金粟冢上酒酣賦詩各成一

首

憶昔避戎馬放棹來北山相逢適中秋展席解愁顏安
知復今夕嘉讌集羣彥烽烟雖未息眼底喜不見華月

出松杪靈颺散天香主稱死便埋荷鍾童在傍酒酬客
哦詩其樂勝鐘鼓柱頭老令威為作八風舞人生不飲
酒杯盃空匱前寥寥數千載孰與劉伶賢

贈章彥復省掾

相約攬秋色淞江來小舟留人十日雨洗耳百花洲
祖逖鞭方著張良著欲籌吾廬吾自愛霜菊晚香幽

偕愚隱長老重過玉山草堂次文中韻

中秋醉眠金粟堆重陽又捧菊花杯欲從南國隱几卧

為約北山禪老來松下低頭拜竒石竹邊隨意坐蒼苔
林風澗月足佳趣安知世有黃金臺

簡嘉興天寧寺西白長老

五月中旬領報書客來兼得問何如天花亂雨袈裟地
祇樹重栽瓦礫墟風月三生情分在煙波百里信音疎
高秋且喜吳田熟說法開堂響木魚

玉山席上分韻得對字

勞生紛如蟻出沒茲大塊達人獨超然逍遙物之外秋

高天氣清喜此良宴會蹇予憔悴容亦忝支許輩黃花
有佳色青山若賓對飲者醉如泥不飲亦慶快卓彼浮
屠師入俗無星礙笑指空中雲非觸亦非背絕倒草堂
翁東壁珊瑚碎

挽華亭呂輔之

諱良佐人號
橫溪居士

屢却安車不赴官黃金多用恤饑寒銘槐西墅雲林屋
釣竹前溪雪浪灘王烈能平鄉里訟龐公獨遺子孫安
只今海內文章伯多憶賓筵禮數寬

寄郭義仲

霜骨稜稜七尺軀昂然獨鶴睨羣雛
門前問字人攜酒
舶上求詩客送珠山色隔溪雲縹緲
梅花繞屋雪模糊
別來歲晚遙相憶愁絕荒江夜月孤

顧玉山移舟月夜過客舍忽聞側室之訃即留
別一詩而去別後和韻以訂重來之約

畫船月下過江村客舍荒涼笑語溫
忽報綠珠飛墮地
輕如玉斗碎鴻門蘭臺久絕行雲夢
蒿里聊傾酌月樽

攜客東橋重問竹柴門當為掃苔痕

代簡牛彥伊

客來為報平安信知在長洲茂苑間借榻眠雲僧舍靜
舉杯邀月客窓寒無家且喜身長健玩世何妨髮已斑
三度梅花曾寄否思君長憶馬鞍山

題王景逸所藏瘦馬圖

將軍百戰自封侯老病誰憐玉腕騮皮肉瘦來渾見骨
精神減盡只垂頭長鳴落日青山下獨立西風白草秋

猶勝駱駝三萬匹都隨壯士死炎州

寄張彥復

蘭省歸來日未斜閉門塵靜似山家教兒楷字謄書藁
遺客生綃寫墨花太伯祠前人走馬姑蘇城上樹棲鴉
知君觸處多懷古忍聽吳趨唱小娃

和馬吉卿韻寄開天啟長老

西望天峰百餘里高僧何日共遊居談禪丈室揮松麈
步屨長廊聽木魚萬壑秋聲饑虎嘯一池雲氣老龍嘘

更尋香逕靈岳下與子聊乘下澤車

贈馬吉卿

太尉初開藩府日我卿長揖與談兵快鞭自此宜先着
偉器如何竟晚成舊菊數株荒老圃寒流一帶統孤城
草廬只在齊門裡堪笑無人識孔明

山人家為路以道作

先生自是青雲人歸來故山鉏白雲家徒四壁藤蘿屋
頭戴一幅逍遙巾松根茯苓大如斗木柄長鑿常在手

賸收柿葉教兒書更摘松花釀春酒題詩滿屋酒滿船
客來無日不陶然人間豺虎自鬪死雲中雞犬多成仙
山人家住山林好日日晏眠無事惱笑他東望玉門關
絕域思歸歎年老

過牛彥伊寓所對雪口占

問訊蛟龍浦來尋鷗鷺盟天風寒鷓屬冰雪歲崢嶸平
旦徐徐起清樽細細傾獨憐鄉國遠西望若為情

美崑山費知府重脩學宮詩

昔侯未牧崑山州州置遠移東海頭百年鄉校風雨毀
四郊戎馬煙塵秋州仍舊山侯下馬勸農耕桑重儒雅
春秋籩豆駿奔走日月宮牆煥圖寫素王清廟袞龍衣
博士高堂鸛雀飛泮池芹藻堪采摘緇林草木生光輝
時方擾攘人用武侯為斯文扶砥柱同僚才並青雲器
參佐功成脩月斧廟前銀杏雙蓋青堂後玉峰開畫屏
諸生揖讓秉周禮我侯語言宗六經官清只飲淞江水
鱸魚自肥蓴自美齊名常袞與文翁興學之功照青史

代道傳招路徵君益上人過西林精舍

西林新種梅花樹未有詩人為品題
尊酒小窓邀上客
杖藜今日過前溪
家園小摘春盤菜
野徑初乾臘雪泥
二老風流堪入畫
不妨琴與鶴同攜

贈水西長老中伯庸兼簡承天毅剛中

禾城說法兩三年
貌虎如林護法筵
一片白雲閑出岫
五湖春水濶連天
詩堪補世方留稿
琴乏知音竟絕絃
賴爾峨峰堂上老
喜留賓客共杯泉

雪中懷杜玉泉玉谿兄弟暨管伯齡

對雪僧窓憶舊遊
浣花溪上草堂幽
弟兄愛客情懷好
賓主談時氣味投
揚楚兩州城近接
吳淞一帶水長流
興來早晚相尋去
解劍漁翁覓釣舟

元日同趙君綽早赴崑山州

烏紗白髮兩遺黎
同賦新年第一詩
吳下喜頒堯日歷
嵩呼重見漢官儀
春回南國梅先得
律轉東風樹未知
試向馬鞍山上望
楚氛猶自暗邊陲

訪王景逸不遇其婿梁國傳留宿東齋作此簡
景逸并允德

阿林隨我曳長裾宿爾幽人水竹居雲暗一天龍吐水
溪喧半夜懶求魚邯鄲枕上新年夢光範門前舊日書
欲與兩賢論出處還家相見意何如

吳生以趙仲穆所書蘇文忠公遊道場何山詩
屬張天英緒人及予和之

溪流行盡穿林麓白塔紅亭照岵谷道場深處看何山

僧住山頭我山足兩山雲似海瀾漫飛路百折空中盤
我昔幽尋愛僧舍亦欲卜築臨清湍東坡先生不世出
咳唾珠璣落禪席可憐前度厄兵燹一踏寶幢誰再植
永嘉山水污歌鬟幸無若人來此間坡詩珍重趙侯寫
使我見詩如見山我衰不夢周公旦猶夢尋山及春半
買花載酒約吳生慎勿渝盟重嗟歎

同楊鐵崖弔龍洲墓和劉韻

排雲闔闔問神州目極龍沙萬里愁匡主首陳天下養

和戎深為國人羞方期殺賊懸金印又報脩文記玉樓
一代人豪公寂寞春風掃墓為停舟

附
楊鐵崖

讀君舊日伏闕疏喚起開禧一段愁龍川狀元曾
表怪冷山使者忍包羞東江風雨一斗酒大地山
河百尺樓白鶴飛來作人語道人赤壁政橫舟

次韻楊鐵崖過李樂菴墓

胸中萬卷色絲長才出織毫補舜裳笑脫鴈冠辭柏府

金史山房全書
卷三
羞看狐穴倚椒房結菴投老林泉樂易簣遺言翰墨香
鐵笛仙翁今表墓婁人當不愧同鄉

次韻寄梅西溪

宦情吟思兩如何咫尺婁江不我過吳下土風良不
惡春來花雨喜無多三農飽喫田間飯諸將猶揮馬上
戈州縣勞人宜莫厭要令襦袴有新歌

寄贈費伯謙

愛爾青年二十餘無心富貴獨耽書楊花雪落滄洲靜

艾納煙銷白屋虛門外自馳金驤
裏案頭長對玉蟾蜍
別來吟得詩多少好寄江村慰索居

簡趙執中

谿鳥忘機與結盟鄰雞解語共談經
簾前花落胭脂雪
樓外山開翡翠屏無事干人腰
嬾折多情于我眼偏青
于今同飲長洲水只隔煙波望德星

過悅堂長老看沈香小山適見楊鐵崖所題畫
像堂堂之容令人起敬因作此以贈

阿師僧中之白眉身長九尺聃耳垂金爛袈裟舊御賜
鐵笛道人新賦詩貝葉手繙諸般若沈香誰琢小須彌
不知門外春深淺花雨繽紛二六時

題恒上人清流堂

悠悠黃天蕩苑彼祇樹林水流過堂下一帶清且深要
之源頭活澄徹無古今山僧作觀想亦以明其心停雲
共徘徊游魚自浮沈三伏不知暑爽氣生綠陰水華晚
色淨風柳孤蟬吟嗟哉五濁世干戈如沸鬻客來且忘

言滄洲濯塵襟

懷道傳上人

海上誰知己僧中有此郎
借人三畝宅留我百花莊
故里煙塵暗窮居歲月長
釜鍾時振乏燈火夜分光
書摘金根誤詩囊夢草香
溪山皆杖屨花竹共壺觴
每念馮唐老能容阮籍狂
五年同信宿十口賴歡康
辟穀終無術飄蓬又遠方
世情多可笑交誼獨難忘
南國黃梅雨西林綠樹涼
思君重迴首湖水隔微茫

懷滄海上人

床頭不問有金無客到山中酒必沽愛我生來心似鐵
逢人為道唾成珠尋梅幾處同舟去對月常時折簡呼
別後合塘春暖柳陰誰與看飛鳧

又自述并簡滄海

齋居頗喜俗塵無坐看諸公玉盡沽滿地楊花風捲雪
一池荷葉雨跳珠借書日與兒曹讀鄰酒時令老僕呼
山上有山曾有約何時雙履作飛鳧

和徐伯樞初還膠山作無錫元度子

昔年歌舞送觥船每日登臨對乳泉
麥秀故基今雖雉花飛南國又啼鶻
官軍尚蹠邊城血田舍初生竈突煙
只恐歸耘歸未得徵車將到白雲邊

次韻贈徐仲剛兄弟

難弟難兄思不羣風流絕似太中君
對床夜聽山中雨避世春耕隴上雲
四株松樹青陰合一帶溪流野色分
老我劍心猶未死尚攜長鋏客田文

次韻贈慶德謙監州

彷彿桃源古洞天幽香兩岸鬪
嬋娟煙波鷗作忘機友
風柳蟬如脫骨仙田父相過終日醉
畦蔬小摘四時鮮
棄官漂水歸來早贏得閑情樂酒邊

還珠詞寄顧仲瑛

并序

余以玉山隱君避地居樵李猶合浦之珠徒而去
焉今謝杭州當路于吳而州縣更化猶合浦之有
孟嘗也人而珠者可不還乎因作合浦還珠詞寄

君以致招要之意其詞曰

嗟爾珠生合浦川澤見光輝采珠人似雨孟嘗不來兮
珠亦良苦鮫泪竭魚目瞽

二

嗟爾珠去合浦川澤失光輝龍嗔獻珠女孟嘗下車兮
魚鼈率舞象罔除吏商阻

三

嗟爾珠還合浦川媚仍含輝潛居水仙府孟嘗愛物兮

物無違迕明月出夜光吐

代簡錢夢弼

六年十見堠山雲愛客情多最憶君社酒每傾鸚鵡盞
燕姬屢舞石榴裙漁郎一去仙源隔鷺子重來舊宅焚
別墅于今鄰錫谷煮茶還許石泉分

絕句

屈原投江死揚雄投閣生一時生死計千古是非心

夏五雜書

使者乘槎海上來，藩臣迎詔府中開。
半年赤地無纖雨，此日青天忽殷雷。
鷓鴣聯班齊喜舞，梟鳴脫網莫驚猜。
征西諸將橐弓矢，應受淮夷納款回。

二

遠客相過說帝都，黃金如土米如珠。
內園人歇催花鼓，市肆塵生賣酒壚。
河北功臣稱李郭，江南租稅賴蘇湖。
明朝漕運開洋去

原闕

三

金瓶梅詞話卷三
寶布初來價倍高吳鹽重推令如毛淡烹尊菜羹無豉
倒看天吳褐有濤風起秣陵號虎兇天連青海縱鯨鼈
長洲茂苑吳山好自媿多憂兩目蒿

四

綠髮年來忽已皤尊前不樂復如何直如柳惠猶三黜
醒似靈均漫九歌無數烏鴉爭晚樹一雙白鳥浴晴波
相逢莫厭滄洲靜要路從前覆轍多

雲文閣為鄒伯常賦

光範門前人似蟻君獨幽棲徵不起西窓拄笏看青山
東閣垂簾熱沈水非煙非霧非霞氛欲斷復續何氤氳
若有龍眠博山底海嶽清氣噓成文梨花夢醒春無跡
一縷猶縈靈壁石白衣蒼狗從變改明月當風自虛寂
可憐權門銅臭兒臍燈將然恬不知何當招之入爾室
三熏三沐論我詩

和徐仲剛歸田

山下室環堵門前柳數株青秧移畝白水似陂湖避

世方躬稼傳家本業儒十年躋仕路兩浙走危途熟路
歸來馬高林返哺烏煙塵雖未息風月不虛孤松葉燒
茶竈花枝挂酒壺拂塵按鹿尾席地草龍須鳥雀窺窓
隙漁樵來坐隅家居聊放適世路甚崎嶇池水魚堪養
庭階草不誅眼前能自足身外更何需病鶴開籠放飢
猿擲果呼看雲添逸興對月了詩逋田父邀皆去村童
醉或扶不嫌鄉俗陋敢學古人迂西堠良田熟東膠小
徑紆泉香雲骨髓花瑩雪肌膚犬吠溪雲出牛歸田野

晡幽居東近海何必更乘桴

寄甯伯讓州倅次仲剛韻

籠鶴乘軒笑衛公歸來高臥北窓風忘機鷗鷺相依久
滿眼湖山與畫同洗馬池邊楊柳綠釣魚亭下藕花紅
自知大器成須晚不與時人校近功

次韻寄斷雲法師

嵯峨塔廟厭長橋東望扶桑路不遙聽法龍來雲滿室
傳衣人立雪齊腰階前祇樹黃金地石上菖蒲碧玉苗

猶記昔年相見日為師吹徹伍員簫

和沈啟之席上詠梅絕句

把酒花前歌竹枝看花不覺舉杯遲
春來結得黃金子
還有調羹鼎鼐時

弔顧將軍墓

并序

顧榮字彥先晉散騎常侍贈驃騎將軍開府儀同
三司諡元公其勲業詳見晉史余嘗慕其為人今
客吳門適近其墓在黃天蕩南地方二三里土人

直以顧榮墓名之子因徃弔焉

白髮吳儂說姓名將軍墓近闔閭城
徵車入洛稱三俊
割炙知人得再生江月似留麾扇影
松風猶作鼓琴聲
停舟一酌蘋花渚野鶴雙飛躑躅鳴

寄徐願齋先生

憶昨天恩頻賜帛數年國步政多艱
莫嫌旅舍纔容膝
喜有丹砂可駐顏進乳吳姬香玉暖
弄雛萊子綵衣斑
故園松菊知誰主又見秋風燕子還

九日

為客東吳年復年吳霜飛上鬢毛邊青山滿眼暗如霧
白雁一聲哀徹天細看茱萸占老健忽聞桃杏作春妍
鄰翁將謂花呈瑞邀我題詩展盛筵

送陳希玄入道

海上蓬萊知有無林泉佳趣即仙都三朝鶴繞燒香几
九轉龍蟠煮汞壚滿地白雲山館靜隔溪紅樹水村孤
敲門莫厭相過客要覓丹書古篆符

題梅竹水仙圖

羅浮美人倚修竹
凌波仙子適相逢
春風桃李自塵土
不浣歲寒冰雪容

代簡淨慈寺顏悅堂長老

南屏樓閣照西湖
四面雲山列畫圖
丞相頻來談般若
老禪端坐結跏趺
長廊百五僧猶在
古井尋常水不枯
獨有門前楊柳樹
春風得似舊時無

代簡倪雲林

金... 卷三
江水西頭繫客槎
漁莊遙望隔鷗沙
枕書門掩三竿日
題畫毫飛五色霞
杯罈椒香仍臈味
階庭蘭茁又春華
雪晴我欲尋梅去
尚待東家借鹿車

次韻陳惟寅懷古

幽尋度香徑
遐思倚琴臺
烏喙嘗膽日
雉妖捧心來
春風煽天艷
滅國輕于埃

二

憑高望海湖
白馬還來無
一杯弔忠魂
江風為號呼
悲

哉扶眼地愁煙暗苔蕪

三

奕奕讓王宮遙遙延陵墓吳儂奉烝嘗春秋幾霜露胡
為後之人無復繼高步

右姑蘇

四

寶鼎移炎祚降王赴幽都遂令虎林人得免馬邑屠獨
憐金盃出啼殺稽山烏

五

輦路土花碧金門
苾芻闕浮海兩龍馬
一去不復還空
遺溫室樹過客猶高攀

六

我來銅駝巷葛嶺
重行行相逢話師相
皆云誤蒼生遺
臭千萬年沙堤湖上橫

右錢唐

烈婦歌

并序

烈婦姓周氏蘇州太倉人至正丙申其父以兵帥
貪虐陰結壯士數輩將殺之謀泄舉家被戮帥之
子悅婦少艾誘為妻不從痛罵而死今鄉人義而
哀之構祠立碑庶夫楊先生為記其事且屬江西
陳季子索詩以著其事

陳君手持烈婦碑勸我為作烈婦歌人生自古孰無死
烈婦之死名不磨本是東滄小家女粉黛不施眉自嫵
父母憐惜恐違離納婿于家半年許阿爺從軍氣頗麤

欲殺不義奔京都手持芒刃機不密身落禍坑家乃屠
繡衣郎君元帥子少年絕愛傾城美願言攜手與同歸
即免梟首尸諸市郎君滿屋堆黃金安知難買烈婦心
耳邊言逐飄風過腹內冤含滄海深罵聲不絕郎君怒
馬上揮刀斫頭去雙鸞羞覩青銅鏡全家甘赴黃泉路
娟娟肌體嬌如雪烈烈肝腸堅似鐵一團冤血注婁江
至今流水聲嗚咽男兒讀書峩冠巾偷生或恐忘君親
奴顏婢膝曳朱紫得不媿此裙釵人嗚呼得不媿此裙

釵人

贈馮縣丞

野夫東郭帶經鋤田峻相逢為下車百里雷鳴元夕後
一犁雨足五更初行庖只飲長洲水署筆頻鈔種樹書
獨奈賦蛇除未得逢人蹙額問何如

二

九土荆榛七八年吳儂挽粟上青天秋風杼柚黃茅屋
春雨犁鉏白水田農畝要令無佩犢琴堂政賴佐鳴絃

停車為說

闕

意

闕

斜陽野樹邊

題墨竹

吾聞雪堂老仙之愛竹到處敲門看漪綠為誰寫此秋
一枝葉葉風生清可掬恍如坐我此君軒與君相對淡
忘言焚蘭金鴨綴鳳髓我思古人欲邁止

盧知州宜興秩滿以避亂久寓無錫視同故鄉
今知崑山必有懷二州風物之美贈詩言情并
致頌禱

我思陽羨茶初生如粟粒州人歲入貢雷霆未驚蟄天
荒地老經幾年春歸又聞啼杜鵑山中靈草化荊棘白
蛇何處藏蜿蜒玉川先生一尺鐵欲剗妖墓救明月丹
霄路斷肝腸熱還憶茶甌飲冰雪

二

我思惠山泉長流無古今瓶罌走千里煮茗清人心向
來烈火炎錫谷神焦鬼爛勢莫撲池邊墮石亦灰飛此
水泠泠瀉寒玉高人飲泉五六年一襟清氣清於泉好

為吳儂洗煩熱乘風歸報蓬壺仙

可笑

崑山州奉省府之命例試在學儒人以余為第三
名故有是作

可笑秋娘已白頭也隨年少上秦樓舞腰強學春風柳
不及春風柳樣柔

送慶德謙知州漕運之京師兼簡陳子山學士
十三萬斛葑田珠一帆南風到直沽天上夔龍應為喜

海中鮫鱔近來無江湖久臥頭垂白雨露重霑紱已朱
寄語玉堂陳學士楚狂憔悴客東吳

顧仲瑛避地嘉興幾二年聞回崑山往見不遇
作詩寄之末篇兼簡西白老

細雨清明節扁舟過玉山傳書元有誤飛鳥竟無還芳
草萋萋碧落花點點斑題名牆外竹黃鳥正間關

二

客來常問訊書去半沈浮兩度黃梅雨相思白髮秋樵

蘇今短笠山水古長洲寄與天寧老龜巢賦咏不

麥飯歌和徐主簿韻

太倉陳陳歲仍熟田舍嗷嗷食無粟朝來飯甑麥新炊
一穗新煙出茅屋磨旋日月吐霏屑湯湧波濤跳碎玉
耕蓑樵笠隴頭歸急雨森如瀉銀竹妻孥笑語同一飽
且免飢雷鳴此腹安知列鼎五侯家日食萬錢猶未足

和陸宗望韻贈夏師魯

百斛葡萄賸有餘一官不換只閑居窓含雲氣虞山近

門掩秋聲栗樹疎
鴻雁去來知幾度
雞蟲得失竟何如
丈夫高蓋非無日
聊遣閑情賦子虛

寄袁仲長

古人心事古冠裳
近代伊誰有比方
杜甫苦吟頭戴笠
管寧危坐膝穿牀
秋風落葉多如雨
老圃黃花獨傲霜
我亦卜鄰依歲晚
讀書東壁借餘光

謝徐伯樞兄弟膠山下墓田

東膠山有牛眠地
西堠村連走馬塘
乞與一坏藏白骨

待看殘夢熟黃梁梅花杏樹堪懸劍竇乳寒泉可薦觴
從此便令童荷鋪諸君賢似古桐鄉

送費伯謙之吳郡侍親

若翁清約似無官宜爾儒衣不厭寒燈火十年勲業在
湖山千古畫圖看水池魚躍共調膳雪屋雞鳴起問安
他日過庭煩寄語別來頭白卧江干

崑山陳伯康築亭山巔楊邊梅過之題曰玉山

高處且為賦詩命郭義仲劉景儀及予和之

神仙中人鐵笛老愛爾玉山雙眼青玉山高處挂手板
鐵笛醉時圍肉屏天生丹穴鳳為石東望黑洋鯤出溟
人傑地靈風物美絕勝西蜀子雲亭

鉛上人席上作

有客有客龜巢翁鬚髯如雪氣如虹權門要路脚不到
寧與山僧野老長游從鉛公喜不縛禪律百榼沽來作
生日雪花似亦為人喜庭舞婆婆俄入室酒邊笑殺東
家兒檳榔不與劉穆之尋常有客謝無酒有時對酒還

攢眉人生能得幾初度且無長繩繫烏兔癡兒夢夢真
可嗤不識盈虛元有數君不見黃頭郎到頭餓死錢堆
傍何如眼前有酒且為樂毋令愁結九迴腸

婁曲書堂

為殷君叙作

汨彼婁水東連于海爰有幽貞居婁之滙蜚舟岸泊婁
人紛拏幽貞有子幼書厥家晨雞既鳴灑掃室堂羞我
甘輒閱我縹緗我經我史如耕如桑我服劬勞罔敢怠
荒黍稌有田魚亦有梁味道之腴游藝之場曰父與子

欣欣樂康其樂維何匪人伊天憧憧往來誰其語旃

遣愁

偶覽青銅鏡方驚白雪髭如何不飲酒猶自苦吟詩
面作鞞紋皺腰間帶孔移獨存方寸鐵剛似少年時

二

茅屋瀕湖住蕪菁借地栽一秋常苦雨十月屢聞雷
岸草青青出牆花灼灼開掃除蠅蚋跡還有北風來

和危太樸參政韻送慶德謙治中

徐驅百騎穩如船
雨露新承下九天
當道故人多汲引
大參佳句獨流傳
數年華髮風塵裡
一點丹心日月邊
老驥只今方展足
蜚聲當不愧前賢

留別知隱愚長老蘇昌齡先生

淞江太湖春水生
湖邊白鷗尋舊盟
遠公沽酒壯行色
坡老題詩慰別情
燕子日長書屋靜
落花風颭釣絲輕
相過不負青山約
一櫂夷猶兩日程

徐伯樞和韻送行予復答之

主人送客呼麴生，膠山下居仍有盟。綈袍戀戀感君意，去國遲遲知我情。教子正須熊膽苦，看花應喜馬蹄輕。老夫把釣扶桑下，目送鵬搏九萬程。

挽雍逸處士

孝友人無間，詩書子更賢。十年遭世亂，三樂得天全。處士星今隕，虛堂月自圓。客來懸榻在，老淚為潛然。

寄謝雙楊沈仲庸并簡同席諸友

一林修竹映滄洲，百榼葡萄泛玉舟。送客留髭成大醉。

憐君小阮與同遊
舊家燕子飛華屋
滿地龍孫著錦裘
絕似蘭亭修禊日
坐中賓客總風流

朱明道等九人和前韻見貽各答一首并自述

一首

新居風景似麟洲
我亦頻來繫客舟
山列畫屏朱果熟
湖開青鏡錦鱗遊
疎狂不厭高陽侶
彫敝應憐季子裘
有酒正須開笑口
黃河今復見清流

右贈朱志道

二

先月軒前杜若洲，抱琴童子釣魚舟。
蝸牛有國方交戰，鷗鳥忘機且共遊。
戲綵諸孫頭峙玉，瀕湖二頃足菟裘。
吟餘不接紅塵事，洗耳無勞枕碧流。

右贈明道

三

楊柳飛花雪滿洲，水邊亭子小如舟。
四時花月供談笑，千古湖山可釣遊。
有客即呼鸚鵡盞，無衣還贈鸕鷀裘。

試聽月旦評鄉里個儻今為第一流

右贈原道

四

清江濯足坐中洲自喜身如不繫舟
槐國功名前日夢玉京辜負少年遊
每邀田父同雞黍已學山人製鹿裘
醉後劇談今古事面如頰玉語如流

右贈趙善良

五

晚涼池館藕花洲
郎罷呼郎放綵舟
老膝尚容文度坐
佳賓多與阿戎遊
長腰米飯猶珍饌
五色萊衣勝綺裘
莫笑東家人諛語
由來涇渭不同流

右贈華子強父子

六

愛君楓落吳江句
有客相投放剡舟
滿眼雞蟲從得失
忘形鵬鷁共遨遊
秋來江上鱸堪鮓
歲晚山中貉可裘
如此幽居良不惡
比鄰况復有詩流

右答盛彥英

七

鍊得身形癯似鶴
江潮杯渡捷于舟
湖邊舊宅適歸隱
吳下諸山今卧遊
學道已知磚作鏡
工詩更悟冶為裘
曹劉沈謝何零落
風月平分支遁流

右答惠上人

八

老夫衰嬾慙無學
年少才華羨李舟
好覓靈槎天上去

莫攀仙桂月中遊
踞床我欲來吹笛
換酒君當為解裘
最喜今年秋至早
涼生六月火西流

右答崔彥麟

九

少年學士俱瀛洲
老夫浮家惟葉舟
每憐古調少人聽
幸得新知如舊遊
四海風塵桃竹杖
十年霜雪木綿裘
爾來同飲太湖水

賦

右自述

過吳江三高祠

三高祠前秋水波客來弔古悲且歌季鷹魯望桑梓敬
蠡也邊豆理則那生為越人身相越百計吞吳吳乃滅
直憂烏喙將無情兔死狗烹肝腦裂飄然攜家湖海遊
捧心人與同扁舟越人誇功鑄金像于吳孰曰非仇讎
行裝重寶久彌厚清高之風絕何有奉嘗堪笑木腸兒
忍觀荒臺麋鹿走江風蕭蕭楓葉寒扣舷折我青琅玕
靈胥怒挾海潮起殷若雷鳴過雪灘

寄僕知州兼簡蔡教授

使君心似婁江水霜落秋高
清復清田野但知耕獲喜
閭閻不識叫囂聲背山館
舍雲連屋通海漕渠潮入城
公退應尋蔡文學投壺置酒
適閑情

病中夢徐伯樞戴時中見過
既而伯樞惠詩次韻答之

病來呼酒當神樓又得牽絲
作釣鈎堪笑生為窮谷叟
何妨死作醉鄉侯四壁西風
茅屋冷一簾疎雨桂花秋

山童淨掃門前路數日頻迎李郭舟

中秋日觀朱明道自壽之詩次韻言懷并紀讌

集

兵戈驅迫十年還此夕珠歌翠舞間出壘葡萄杯濫濫
盤鈴傀儡錦斑斑達人不惜千金費浮世能逢幾日閑
月裡嫦娥應笑我也將華髮對嬌鬟

追和侯良齋秋懷

寸絲欲補袞龍衣歲月蹉跎素願違身老江湖心未已

夢遊京洛覺還非
蕭蕭木落青山瘦
浩浩西風白鴈飛
慚愧太湖清似鏡
照人雙鬢短垂絲

二

出入都無騎
從隨杖藜於我頗相宜
詩成每得江山助
酒病還將麩藥醫
杜甫眼前茅屋在
陶潛心事菊花知
朝來兩袖西風
淚遙為鄉人灑肉籬

三

世事無涯生有涯
逍遙誰得似南華
龜巢近傍三江
水

鷗侶平分半席沙
稚子學書叔柿葉
老妻添絮采蘆花
客來且共藜床坐
莫說金張許史家

四

垂蘿曲磴絕攀緣
挑酒筇枝不挂錢
白石路傍如虎踞
青松澗底作龍眠
一杯且咏重陽日
二頃何須負郭田
風景不殊陵谷異
丹心雪髮兩堪憐

六柳庄爲沈太守作

彭澤五株柳清風
千載餘顧予心
乃心修名難與俱
所

以樹六柳于焉結吾廬門前有流水樹下堪釣魚我柳
已成陰豈不懷歸歟人生一趨舍世事紛萬殊善學柳
下惠風雨慎守居繼跡子陶子亦曰姑徐徐誰其知此
心南山默如愚

九月八日朱原道席上作

主人預晏重陽客我老重逢癸卯年醉把黃花簪席帽
笑攜紅袖棹觥船洞庭山色軒窗外震澤波光几席邊
不用登臨勞騎從恍如蓬島醉羣仙

為吳中行題畫

老樹骨立偃蹇秋山氣勢崔嵬閑却一江風月扁舟罷
釣歸來

次韻答珏仲瑛

客僧留客古禪宮湯若爐熏對菊叢佛法不隨塵世變
鄉心猶與故人同一林紅樹含疎雨半壁青天截斷虹
早晚相尋東海上扁舟相趁落花風

題春江獨釣圖

江碧山青雨過時
輕煙漠漠樹離離
白頭呂望鷹揚去
獨釣滄洲是阿誰

過崑山王御史墓

宋御史王褒字彥先登宣和進士第紹興初上疏
論十弊切中時病後告老居崑山逸野堂所著有
春秋集傳等書行于世墓在州南久廢之餘賴知
州僕公復之友人殷孝章以其事索詩故有是作
先生逸野堂何在仰止崑山有所思麟史立言三傳外

鷹冠遺直中興時一坏難污孤忠骨十弊猶存蹇諤辭
過客下車翁仲立共看重樹墓前碑

簡金君玉

峩峩洞庭山宛在水中央山風西北來微帶橘柚香吾
有山中居一别今十霜題橘宜有書鴻雁日南翔老懷
多感慨煙火生肺腸作詩報君知湖山迴相望

聞杜玉泉臥疾以詩代簡

聞君臥讀床頭易世事更新恐未知一國山林包錦繡

五湖煙水照旌旗
天寒日暮人相憶
冬至陽生歲又稀
江柳鵝黃春草綠
幽尋當不負前期

次韻沈啟之宴飲

柏酒春三日梅花信有風
赴君雞黍約醉我鹿皮翁
凍雪山頭白晴雲海上紅
天高不可問吾道未應窮

贈慶別駕

台州別駕不之官
煙水孤村共歲寒
偶有濁醪留晚酌
旋挑生菜簇春盤
三年鄰里通家好
四海兵戈行路難

且喜門前金色柳東風堪作畫圖看

送人妾為尼

燕子樓中別綺疏象王宮裡學真如秋波獨注蓮花漏
春筍頻翻貝葉書十二雲峰無復夢三千沙界本來虛
散花天女長圍繞觀色觀空樂有餘

路義道見訪示詩言懷予次一首

書畫船來城郭外客窓春作雨陰中一違談笑經年久
又得壺觴此日同江水照人清似鏡山頭戴雪白如翁

新詩屬和題青竹几杖相隨許阿戎

次鄭起南縣丞出郊

出郭問農事哦詩思不羣犁鉏江上雨桑麥隴頭雲
雉行相逐雄鳩語更聞野翁相勞苦飛蓋倚晴曛

上元夜賦雪

此夕何夕風作威急雪打我白板扉大如鵠鶴小鷗鷺
乘風作陣橫空飛老夫起坐驚且喜窓隙壁罅皆珠璣
鄰家兒女時未寢看與燈月爭光輝夜深人靜燈燭滅

密掩姮娥爛銀闕恍如太極未分時混沌之天無日月
須臾忽聽簷竹折驚動老夫方寸鐵直憂壓倒湖上山
連我龜巢化魚鰲老龜縮頸牛衣中夜長如歲心忡忡
鄰雞三號催曉發燭龍飛出扶桑東口銜火珠光燄紅
萬國一照春融融客懷愁與雪俱釋青山依舊撐虛空

吳門訪路義道和古詩

客來上元夜筠軒照晴雪對雪飲流霞敲冰煮團月誦
君詩數篇忘我衣百結一笑看梅花餘事不復說

二

新年到城市憂思喜一雪復覩漢官儀仍書王正月蘇
州古名郡刺史得元結老我愚溪愚無勞捕蛇說

贈楊君濟縣丞

我思崑山鉏白雲高軒訪我麋鹿羣我今長洲釣明月
君適過此寂寞濱感君相知式相好與君談笑開懷抱
坐分半席白鷗沙滿目青山淨如掃社公雨晴風作惡
村北村南杏花落勸農來往杏花村雞犬不驚田舍樂

君歸哦松坐松陰我舟更入菰蒲深釣鉤無餌勿語人
但說煙波無處尋

寄蕭舜卿蕪簡虎丘寧居中長老時蕭年八十

三矣

愛爾林居虎丘寺劍池磐石好林泉一門父子頭如雪
十載兵戈命在天故國青山還歷歷春風芳草自芊芊
生公會有招賢意我亦來從種白蓮

達至善自錢唐過訪會徐伯樞昆仲諸友小酌

以杜少陵春日鶯啼修竹裡句分韻得日字

兼旬苦陰雨陰蘚青入室良朋遠方來一笑百憂失
闕別十載餘艱虞能盡述喜聞戎馬間猶得用儒術間關
脫虎口壯志曾不屈歸來西湖上飲水獨食蜜中吳舊
新知生存百無一龜巢酒盈樽聊以永今日兩兒聆言
話諸孫亦繞膝殷勤問生理為我長太息干戈紛滿眼
世事暗如漆願言慎所之終焉保貞吉

雪舟詩為王照磨作

雪中傲兀乘孤舟千載復見王子猷吾知君欲記高興
君聽我言當點頭男兒胸中有兵甲筆底聽滔水三峽
正須擊楫誓中流雪外蓬婆爭蹴踏長驅夜入懸瓠城
指揮鶯鴨混軍聲生擒逆豎取金印江海却尋鷗鷺盟

和沈啟之早春書懷

水光山色淨無塵滿眼東風景物新
繭栗攢眠芳草地木蘭船繫綠楊津
莫嫌頭上鬢鬆雪且盡杯中漱澁春
鶴自乘軒鳥自好滄洲鷗鷺與情親

簡錢仁山

一榻青苔對雪五湖春水流
澌欲遣長鬚覓酒同拈禿
筆題詩

二月七日和徐伯樞排悶

人生百年能幾何有酒快酌金叵羅
已看蓬鬢點蒼雪
莫待桑田變白波東風花外鶻聲喜
落日城頭烏尾訛
君詩到手客在座擊節聽我玲瓏歌

伯樞以啟之韻作詩見贈復答一首

蕭齋孤坐席凝塵喜得君詩字字新四海交遊期管鮑
一家兄弟比椿津多情燕子重來日絕色桃花不負春
媿我少年書劍在白頭無復報君親

贈星術王遠夫

虞廷命官非不多歷象必先義暨和義和去今數千載
名與列宿俱嵯峨先生本學義和氏聊爾談星隱吳市
二十八宿緯五星上繫天時下人事先生為人推吉凶
一天星斗羅心宵河圖洛書造化窟妙理貫徹精靈通

齋居垂簾坐終日金鴨焚蘭煙霧碧客車載酒來問情
先生舌端飛霹靂每將忠孝語臣子不惜忠言逆人耳
天降灾祥本在人人能轉移天亦喜君不見宋君三善
言熒惑退三舍天人果相孚大咎亦可謝又不見韓退
之命在斗牛身坐箕遭讒受謗能自知怡然高咏三星
詩吾儕此理或未析請從先生考星歷

和部彥清州判暮春寓僧舍

治最功成解印歸春風綠髮未應稀如何拄笏禱床下

閑看孤雲倦鳥飛

二

沈水香消午篆煙
僧房聊借石床眠
多羅樹上頻伽語
絕勝天津聽杜鵑

三

篋藏緗帙沁雲香
手閱金經掩竹房
門外不知春早晚
綠陰滿地日初長

雨中寄友人

春風冷淒淒煙雨晝冥冥相望隔重湖幽事頗關情
賴有小吳牋可以寫心聲心聲寫難盡况無雁南征
出門泥沒膝恨不生羽翎隔窓兩黃鳥花間語嚶嚶
頽然枕書卧一榻莓苔青



龜巢稿卷三